

Schweizimi atuartitaanermut ilnniartitaanermullu perorsaariaatsimut tunngatillugu aaqqissuussisimanermikkut qanoq iliorlutik inuusuttortami pingajorarterutaasa aappaata inuussutissarsiutigalugu ilnniartitaanermik naammassinnittarnerat qulakkeerlugulu siuarsarsimaneeraat pillugu Naalakkersuisut misissueqqullugit peqquneqarnissaannik Inatsisartut aalajangiiffigisassaattut siunnersuut. Misissuinermi aamma nalilersorneqassaaq Schweizimi atuartitaanermut - Ilnniartitaanermullu aaqqissuussisimanerup sannaasa ilaannik nunatsinni iluaqutaasumik atuisoqarsinnaanersoq. Misissuinermi inerniliussa UPA2018-imi saqqummiunneqassaaq.
(Inatsisartunut ilaasortaq Suka K. Frederiksen, Siumut)

Akissuteqaat

(Ilnniartitaanermut, Kultureqarnermut, Ilisimatusarnermut Ilageeqarnermullu Naalakkersuisoq)

Siullermeerneqarnera

Ilnniartitaanermut Naalakkersuisoq qujavoq Inatsisartut aalajangiiffigisassaattut siunnersuummut Inatsisartunut ilaasortamit Suka K. Frederiksen, Siumumeersumit saqqummiunneqartumut.

Naalakkersuisut Schweizimi aaqqissuussineq atorneqartoq ilisimasaqarfigereerpaat. Naalakkersuisut aallarniutigalugu erseqqissarniarpaat Schweizimi atuartitaanikkut aamma inuussutissarsiutinut ilnniartitaanikkut aaqqissuussinerit annertuutigut maani nunatsinni atukkatsinnit allaanerussuteqartut.

Kalaallit Nunatsinnit allaanerussutaasut Schweizimi ilaatigut ilagaat sungiusaammik suliffissat amerlasuut pigineqarnerat, tamannalu pissutaalluni inuiaqatigiit aamma inuussutissarsiorderup aaqqissuussaana annertuumik allaanerussuteqarput. Sungiusaammik suliffissat amerlasuut aqutugalugit ilnniartup karakterii appasikkaluarpataluunniit ilnniartuq sungiusaammik suliffissaqartinneqarpoq. Aamma eqqaaneqassaaq atuartut sanngiinnerusut nunatsinnut sanilliullugu ikinneerarsuunerat. Inuiaqatigiinnilu aningaasarsiornikkut nukittuumik inissisimasuni periarfissaqarpoq inuit ikittunnguit immikkut sullinneqarnissamik pisariaqartitsisut aningaasassaqartinneqarnerat, taakkua inuussutissarsiutinut ilnniakkamik naammassinnissinnaanissaannut.

Schweizimi meeqqat atuarfiat annertuutigut nunatsinni meeqqat atuarfianniit allaanerussuteqarpoq. Tunngaviusumik atuaqatigiit ataatsimut atuartinneqartarnerat uagut atugaraarput, atuartut piginnaasaat inuttullu tunuliaqutaat naapertorlugit immikkoortitserneqarfigisanngisaa, siornatigutut ilaatigut oqaatitsigut inuttullu piginnaasanik

tunngavilimmik immikkoortitserisarneq, klassinut A-nut aamma B-nut. Schweizimi immikkoortitsigaapput atuartut piginnaasaat tunngavigalugit 6. klassip kingorna immikkoortitserneqartarlutik.

Schweizimi inuussutissarsiutinut ilinniartut ullut marluk atuartarput ullullu pingasut sungiusaammik sulisarlutik. Tamanna tigussaasumik nunatsinni atorsinnaanngilarput, nunatsinni avinngarusimasuni najugaqarfeqarnera pissutigalugu.

Illuatungaatigulli ajoqutissaqanngilaq Naalackersuisut Schweizimi aaqqissuussinerit ilaanit isumassarsiorsinnaanerput, atorsinnaasatsinnit ineriartortissinnaasatsinnillu, aammalu uagut nammineq ilinniartitaanermik aaqqissuussinitsinnut naleqqussarsinnaasatsinnik.

Taamannalu assersuutigalugu atuuppoq Call Center-inik taaneqartunut, qitiusumi inissisimasartunut ajornartorsiutit assigiinngisitaartut atugaasut eqqarsaatigalugit, inuusuttunik ilinniartitsinernut atatillugu naammattoorneqarsinnaasunik. Call centeri taamaalaat ilinniartumut namminermut sammititaanngilaq, kisiannili aamma angajoqqaanut, atuarfimmu, ilinniartitsisunut, suliffeqarfinnut allanullu, ataatsimoorlutik aaqqiissutissanik oqalliseqarfigisinnaasaat, ajornartorsiutinut ataasiakkaanut atatillugu, inuusuttut ilinniagaqartut aqqusaartagaat eqqarsaatigalugit.

Uagut maani nunatsinni atukkagut tunngavigisagut aallaavigalugit ineriartortitsiniarpugut. Schweizimiullu aaqqissuussinerit sulinerminni tunngavigisaat, maanna Naalackersuisut ilinniartitaanernut pilersaarutaanni ilaareerput. Ilinniarsimassutsilli malunnaatilimmik kivinnissaani amerlasuutigut ileqqunik tunngaveqartarpoq, aammalu tunngaveqarluni angajoqqaat inuiaqatigiillu avatangiisaasut inuusuttuaqqamut ilinniagaqartussamut piumasarisartagaannik, kiisalu meeqqat atuarfiata nukittuujunissaanik. Taamaattumik piffissaq nukiillu atorneqaqqaartariaqarput anguniakkat anguneqarsinnaaqqullugit, inuusuttatta tamarmik ilinniakkamik aallartitsisarnissaannut meeqqat atuarfiata / efterskolip / højskolip kingorna, ilinniakkaminnillu naammassinnittarnissaannut.

Naalackersuisut ilanngullugu erseqqissassavaat ingerlaavartumik ilinniartitaanernut pilersaarummi nutaaliortoqartarmat, ilinniartitaanerni kigaallasaatit amerlasuut eqqarsaatigalugit, ingerlaavartumillu isumassarsiortoqartarmat Schweiz-imiinnaanngitsoq aammali nunanit allanit, suliniutit ataasiakkaat nalilerneqaraangata nunatsinni tunngavigisagut aallaavigalugit atorsinnaasutut.

Taamaattumik Naalackersuisut misissuinernik aallartitserusupput Call centerinik pilersitsisinnaaneq eqqarsaatigalugu, ilaatigut ilinniarfinni ilinniartut tigummiinnarniartarnerat eqqarsaatigalugu. Naalackersuisunut pingaaruteqarpoq suliassaq aaqqissuunneqarluni siunnerfilersorneqassammat uagut nammineq periarfissagut tunngavigisagullu aallaavigalugit, taamalu pioreersunik ilaarsinerinnaanani.

Taamatut oqaaseqarluta Naalackersuisut inassutigissavaat siunnersuut itigartinneqassasoq